

春秋說畧

春秋說暑卷七

樓霞郝懿行學

海陽趙銘彝校刊

宣公

元年春王正月公卽位

桓卽位忍也宣卽位忍也皆與聞乎故也

公子遂如齊逆女

爲桓逆者翬也爲宣逆者遂也皆賊也公以喪昏者急自結於齊

三月遂以夫人婦姜至自齊

遂不稱公子蒙前文也姜不氏者暑辭也此未有言納幣者一禮不備貞女不行公以喪娶夫人行非貞也或曰不稱氏貶也非也夫人一國之母非臣子所當貶也稱婦者有姑辭

也出姜出無姑矣敬嬴者妾姑也成乎宣公之篡者仲遂敬  
嬴○杜預以不書氏爲闕文非也

夏季孫行父如齊

晉放其大夫胥甲父于衛

放者棄而置也放或稱國或稱人何也放與殺同例○或曰  
稱國以放者放有罪稱人以放者放無罪非也

稱人以放  
見哀二年

公會齊侯于平州

公子遂如齊

六月齊人取濟西田

濟西田取諸曹者也齊何爲取諸魯賂故也何爲賂會平州  
之路也何爲會平州定公位也此魯田何爲不言我互見也  
據十○桓之立也許田假於鄭宣之立也濟西取於齊皆賂

也胡氏例以會者外爲志此宜稱及而曰會誅齊以孤賊黨也非也

秋邾子來朝

楚子鄭人侵陳遂侵宋

晉趙盾帥師救陳

楚侵陳宋圖霸也晉救陳急陳也不救宋蓋宋未病也或曰宋有罪不與救也或曰闕文也皆非也救則書不救則不書宋公陳侯衛侯曹伯會晉師于棐林伐鄭

晉趙盾旣救陳移師於棐林四國往而會之也何以不言會趙盾大夫與師敵各隨其事以著稱此爲兵會非好會故稱師胡氏主公羊謂君不會大夫非也

冬晉趙穿帥師侵崇

晉人宋人伐鄭

傳曰伐崇爲秦也伐鄭爲宋也俄而鄭敗宋秦伐晉

二年春王二月壬子宋華元帥師及鄭公子歸生帥師戰于大

棘宋師敗績

華元

皆言帥師將尊師衆也言敗復言獲大夫與師敵也

秦師伐晉

夏晉人宋人衛人陳人侵鄭

秋九月乙丑晉趙盾弑其君夷皋

經曰盾弑傳曰穿弑入穿所以出盾也謬也傳所以出盾者爲盾賢也賢也而弑君則所謂賢者乃所以釣世之名而蓋其彌天之罪傳者爲所欺而曲庇之耳果若不討賊者經當書趙盾使穿弑其君夷皋或云盾旣外出變由內作亦當

許后之弑霍光不知懿行謂卽如此霍光不討妻顯光不爲無罪雖復入穿終不能出盾。趙盾許止諸獄如傳所載顯悖於經當如歐陽子信經不信傳

冬十月乙亥天王崩

三年春王正月郊牛之口傷改卜牛牛死乃不郊猶三望

口傷自傷也或言卜郊或言卜牛何也卜郊者兼卜牲日卜牛者專卜牲也牛死乃不郊爲牲廢郊也卜郊不從乃不郊爲牲日皆不吉廢郊也牛傷牛死何以書爲災也卜郊不從何以書爲譴也災於物譴於天以爲上帝弗歆也禮爲天王服斬衰王崩猶未葬還僭越祔滋益罪也

葬匡王

楚子伐陸渾之戎

戎在伊洛近王都楚子伐之無君甚矣傳曰蓋問周鼎焉

夏楚人侵鄭

秋赤狄侵齊

宋師圍曹

冬十月丙戌鄭伯繭卒

葬鄭穆公

葬不月闕文也

四年春王正月公及齊侯平莒及郕莒人不肯公伐莒取向

莒郕有怨平之義也挾齊侯而強之平非義也莒人不肯義不肯也平而伐之不義甚矣傳曰其言不肯何辭取向也

秦伯稻卒

夏六月乙酉鄭公子歸生弑其君夷

據傳子公實弑加之歸生者與聞乎故也非也與聞者信有罪釋首賊而坐與聞之人然則春秋成而亂臣賊子免矣。傳曰鄭人討幽公之亂斫子家之棺逐其族其爲歸生弑可知

赤狄侵齊

秋公如齊公至自齊

冬楚子伐鄭

五年春公如齊

夏公至自齊

秋九月齊高固來逆叔姬

公穀經作子叔姬

傳曰公如齊高固使齊侯止公請叔姬書曰來逆公自主也厭尊毀列辱已甚矣。公穀經竝爲子叔姬此下經亦爲子



叔姬而此經無子字蓋闕文宜從公穀

叔孫得臣卒

冬齊高固及子叔姬來

高固來反馬也子叔姬來歸寧也反馬不躬至歸寧無竝行古者自天子以至大夫皆有甯車反馬之道反馬之節以三月

楚人伐鄭

六年春晉趙盾衛孫免侵陳

夏四月

秋八月螽

螽何爲或繫月或繫時繫時者久也繫月者未久也雖未久書也

冬十月

七年春衛侯使孫良夫來盟

夏公會齊侯伐萊

秋公至自伐萊

大旱

冬公會晉侯宋公衛侯鄭伯曹伯于黑壤

良夫來盟衛欲爲晉致魯也會于黑壤始從晉也傳曰公不與盟諱之非也經惟書會耳實未嘗盟也若實盟言會何以取信乎

八年春公至自會

夏六月公子遂如齊至黃乃復

復者事未畢何以復有疾也何不言有疾君命不爲疾止也

死以尸將事

辛巳有事于大廟仲遂卒于垂壬午猶繹萬入去籥

有事者時給也以于大廟知之遂不稱公子蒙前文也其稱仲著貴寵也繹者賓尸也猶者可以已也萬者舞也以無聲入籥者管也以有聲去檀弓曰非禮也卿卒不繹。公羊以萬爲千舞籥爲籥舞非也毛氏詩傳以千羽爲萬舞是萬兼二舞

戊子夫人嬴氏薨

晉師白狄伐秦

或稱赤或稱白何也殽之役姜戎稱及此不稱及蓋白狄爲主抑或莫適爲主也

楚人滅舒蓼

秋七月甲子日有食之既

冬十月己丑葬我小君敬嬴雨不克葬庚寅日中而克葬

己丑葬日也庚寅非葬日也葬既有日不爲雨止禮也雨不克葬權也葬以平旦虞以日中禮也日中而葬慢也。馮氏荆南曰書日中而克葬譏亟也若葬無譏則書庚寅而克葬可也蓋葬必以朝既以雨止而至庚寅何不可更易一夕之期而必以日中亟葬哉

城平陽

楚師伐陳

九年春王正月公如齊公至自齊

夏仲孫蔑如京師

齊侯伐萊

秋取根牟

根牟東夷邑也國曰滅邑曰取不書將帥微者也

八月滕子卒

九月晉侯宋公衛侯鄭伯曹伯會于扈晉荀林父帥師伐陳辛酉晉侯黑臀卒于扈

傳曰會于扈討不睦也扈晉地也凡外諸侯卒於師曰師於會曰會在其國都不地於封內則地不葬者魯不會

冬十月癸酉衛侯鄭卒

宋人圍滕

楚子伐鄭晉卻缺帥師救鄭

陳殺其大夫洩冶

殺諫臣也殺諫臣未或不亡也傳曰靈公淫洩冶諫公孫寧

儀行父請殺之公弗禁

十年春公如齊公至自齊

齊人歸我濟西田

取矣何爲歸以魯服故也取不言我歸言我互見也。○馮氏  
荆南曰歸田獨此書我者濟西之田齊與諸侯皆有之而所  
歸獨我故封也若鄆譙闕則魯邑也龜陰之田獨魯有也而  
書我則贅矣

夏四月丙辰日有食之

己巳齊侯元卒

齊崔氏出奔衛

崔氏者何不知也或曰杼也或曰非杼也不名何也傳曰氏  
者舉族而出之之辭也。○豐氏曰是崔天也氏天篆文相近

而譌恐非

公如齊

五月公至自齊

癸巳陳夏徵舒弑其君平國

六月宋師伐滕

去年圍滕既因其喪今又伐滕暴亦甚矣傳曰滕恃晉而不事宋

公孫歸父如齊葬齊惠公

晉人宋人衛人曹人伐鄭

秋天王使王季子來聘

傳曰王季子者王之母弟也其來聘也以報蔑也周聘魯止此。方氏苞曰書王季子未有職司也或曰時王之子猶時

君之女稱子以別也並通

公孫歸父帥師伐邾取繹

大水

季孫行父如齊

冬公孫歸父如齊

齊侯使國佐來聘

傳曰行父如齊初聘也歸父如齊伐邾故也國佐來聘報聘也君未踰年不舉爵未即位不遣使此書齊侯使何也三月而葬太不懷也來聘稱使卽吉速也君子以齊頃爲無哀矣饑

穀不成曰饑或言饑或言大饑何也大甚也饑未甚也雖未

甚書也

春秋饑二  
大饑一



楚子伐鄭

楚五伐鄭暴也稱子稱人義非褒貶親將與不親將爾胡氏說並非

十有一年春王正月

夏楚子陳侯鄭伯盟于辰陵

楚莊始主諸侯盟也胡氏謂因其能謀陳而進之陳氏汪氏謂子楚以霸皆非也方氏苞曰傳稱侵鄭及櫟未嘗一語及陳事蓋因鄭服并徵會於陳而爲此盟本無討賊之心可知矣

公孫歸父會齊人伐莒

秋晉侯會狄于欒

冬十月楚人殺陳夏徵舒丁亥楚子入陳納公孫寧儀行父于

陳

此一事耳楚或稱人或稱子何也屬辭之體也若書楚子殺之則不辭猶之執大夫皆稱人以執之無目其君者也或曰稱人以殺討賊辭也非也討賊者不繫於稱人不稱人也楚亦非真能討賊者也宋人執鄭祭仲非討賊辭也楚人執陳行人于徵師殺之亦非討賊辭也入者不有其地公孫寧儀行父者陷君於惡者也又納之杜氏預曰二子功足補過善楚復之謬也○李氏紱曰造其國都曰入株林野郢去國都甚遠徵舒弑君豈敢復入國都楚子蓋就其私邑執而殺之然後入陳耳經書丁亥在殺徵舒之後正明殺而後入傳謂入而後殺誤矣○懿行按以經文推之蓋楚先遣大夫殺徵舒於私邑然後楚子親入其國都故殺徵舒稱楚人入陳稱

楚子乃獵上書齊人伐止戎下書齊侯來獻戎捷

十有二年春葬陳靈公

靈公弑三年矣始葬者漫也抑或徵舒亂國不得葬也傳曰賊不討不書葬然則賊不討而葬者多矣周桓王七年乃葬豈亦討賊而葬也

楚子圍鄭

夏六月乙卯晉荀林父帥師及楚子戰于邲晉師敗績

林父臣也楚子君也何爲以臣及乎君春秋之法尊內而抑外先林父者內晉也後楚子者外楚也昔者齊衛王命伐衛春秋以衛及齊豈亦內衛外齊乎彼蓋屬辭之體也先書齊伐見主兵在齊後書衛及明主戰在衛傳者緣此謂凡戰言及皆爲主乎是戰非也艾陵之役吳主戰也而以齊國書及

之則以內及外也明矣林父何爲戰邲救鄭也不言救不及也偏師輕戰失律勦民自是楚莊橫日以兵力劫諸侯

秋七月

冬十有二月戊寅楚子滅蕭

經言滅傳言潰非實也楚旣滅之厥後展佗疆地入蕭以叛豈楚滅之不能有其地猶屬於宋與

晉人宋人衛人曹人同盟于清丘

四國稱人皆大夫也其曰同盟志同欲也盟之言曰恤病討貳陳貳於楚宋伐之衛救之非討貳也楚伐宋晉不救非恤病也清丘之盟未寒也

宋師伐陳衛人救陳

十有三年春齊師伐莒

春秋說畧

卷七 宣公

夏楚子伐宋

秋螽

冬晉殺其大夫先穀

穀違命而敗邲雖信有罪矣晉釋將而誅佐又加以召狄之罪盡滅其族甚矣

十有四年春衛殺其大夫孔達

夏五月壬申曹伯壽卒

晉侯伐鄭

秋九月楚子圍宋

晉伐鄭邲故也楚圍宋陳故也皆稱爵君將也胡氏釋鄭罪晉釋楚罪宋頗矣

葬曹文公

冬公孫歸父會齊侯于穀

十有五年春公孫歸父會楚子于宋

夏五月宋人及楚人平

書宋及楚以內及外也上書公孫歸父會楚子于宋下書宋人及楚人平蓋魯實平之也內及齊平及鄭平皆不書人此書人何也屬辭之體也平者繫一國之事目君大夫則嫌於一人之私內既不目君大夫而外書齊人鄭人則贅矣若外及內平則無問其君大夫一皆稱人於義無嫌鄭人來渝平是也此宋人及楚人平則未知其君之意與或大夫之意與傳曰稱人貶也平者在下非也鄭人來渝平何不亦云平在下貶也○方氏苞曰使欲見平者在下則如袁婁書宋華元及楚子反盟不更切著乎

六月癸卯晉師滅赤狄潞氏以潞子嬰兒歸

潞氏國子爵赤狄別種嬰兒其名也

秦人伐晉

王札子殺召伯毛伯

王札子疑當爲王子札也文誤倒耳傳曰王孫蘇與召毛爭政使札殺之臣不忌君無政刑也傳曰兩下相殺不志乎春秋非也大夫無專殺君殺大夫猶書之大夫殺大夫反不書乎凡兩下相殺稱名別於君殺也

秋螽

仲孫蔑會齊高固于無婁

初稅畝

初者始也稅者取民也畝者田畝也周制九夫爲井井九百

畝分之九夫夫百畝徹取十畝以爲賦而不收餘畝之稅故曰徹田爲糧又曰歲取十千古者藉而不稅稅畝非古也既收十畝之入復履餘畝稅其十一是十取二也其後哀公謂有若曰二吾猶不足如之何徹也自是用田賦○孟子言井中爲公田八家私百畝乃殷人助法非周之徹也徹無公私田

冬蠅生

蠅者蠡子也何以書淳災也蠅何以言生蠡何以不言生蠡飛蔽天不知所自來故不曰生蠅見其生而知之故曰生蠅生還爲蠡

劉歆以蠅爲蚘蚘子非也蠅卽蚘蚘說者謂不因牝牡腹中陶冶而生故名

饑

蠡蠅者一時災饑者一歲災



十有六年春王正月晉人滅赤狄甲氏及潁吁

甲氏潁吁赤狄別種言及者別二族既滅潁氏又并盡其餘  
黨

夏成周宣榭火

成周洛陽王之下都宣榭蓋宣王講武屋也凡有廂有室曰  
廂無廂有室曰寢無廂無室曰榭或曰宣榭者樂器存或曰  
宣王廟皆非也廟不得謂榭榭不得藏樂火者人火之何以  
書存古也○經無書火者獨此有之公穀二經亦竝爲災字  
疑此經本亦爲災偶脫其上爲火耳

秋邾伯姬來歸

來歸大歸也歸邾何以不書常也來歸何以書變也常事得  
禮不書變事雖得禮必書邾伯姬何以不卒旣出不卒杞叔

姬何以卒爲逆喪卒也

成八年九月

冬大有年

大者非常辭有者非常有大有年大熟也

十有七年春王正月庚子許男錫我卒

丁未蔡侯申卒

夏葬許昭公葬蔡文公

六月癸卯日有食之

己未公會晉侯衛侯曹伯邾子同盟于斷道

同盟者同欲也或曰同外楚或曰同謀齊或曰本爲外楚徵

會齊侯不至故復謀齊

秋公至自會

冬十有一月壬午公弟叔肸卒

叔氏肸名也或稱公子或稱公弟何也主先君言曰公子主時君言曰公弟凡內稱公子皆卿也卿卒禮也此未仕何以卒傳曰賢也何以賢通恩也宣弒立肸非之欲去則不可仕則不義與之財不受織屨而食終其身○或曰稱叔者譏世卿非也季友仲遂叔肸稱氏者皆以公爲之變而加禮故特著之方氏說是

十有八年春晉侯衛世子臧伐齊

公伐杞

夏四月

秋七月邾人戕鄆子于鄆

戕者殘殺之於國都者掩其不備鄆子不名史失之

甲戌楚子旅卒

楚不卒此何以卒告則卒弔則卒楚莊彊會盟征伐交乎諸侯於是始卒之何以不葬避其號也何以稱子從其爵也

公孫歸父如晉

冬十月壬戌公薨于路寢

歸父還自晉至筮遂奔齊

還者事已畢筮魯地未及國也何以奔蓋逐也禮君薨聘使執圭復命於殯歸父家遭墜帷哭踊介復命走之齊然則誰逐之傳曰季孫行父言於朝而逐之捐君殯奔父使於臣爲死君於子爲死父

春秋說畧卷七

春秋說畧卷八

棲霞郝懿行學

海陽趙銘彝校刊

成公

元年春王正月公卽位

二月辛酉葬我君宣公

無冰

三月作丘甲

作爲也甲兵也丘者十六井也古者甸出甲丘不出甲甸者六十四井也其地爲一成其賦車一乘出甲士三每一甲統步兵二十四合爲七十二故甲者甸賦也非丘賦也何以謂之丘甲一丘出一甲則四丘四甲也古者四丘爲一甸今三丘當一甸是益兵也何爲益兵傳曰齊難故也○甸與乘古

字通成方十里甸旁加一里也周制甸賦所出丘得十八人不及一甲今令丘出二十五人則一甸所賦計百人矣故曰益兵○公穀以甲爲鎧非也杜氏預謂使丘出甸賦加三倍亦無是理獨胡氏得之

夏臧孫許及晉侯盟于赤棘

秋王師敗績于茅戎

王師者非王將也茅戎者戎屬也王者無敵王師何以敗自敗也不言戰省文也傳曰劉康公徼戎伐之叔服諫不聽敗焉

冬十月

二年春齊侯伐我北鄙

夏四月丙戌衛孫良夫帥師及齊師戰于新築衛師敗績

以衛及齊者齊稱師非卿將也故後衛

六月癸酉季孫衍父臧孫許叔孫僑如公孫嬰齊帥師會晉卻克衛孫良夫曹公子首及齊侯戰于鞏齊師敗績

凡戰書將不書佐此其書之何四卿並將也四卿將者三軍也臧孫許逆晉師遂導之故與乎帥師耳四國戰鞏或曰爲婦人一笑也或曰齊卽楚故也袁婁盟而齊從晉者三十載○方氏苞曰春秋時軍帥正佐皆卿許行父之佐也嬰齊僑如之佐也蓋是時魯止二軍故其後三軍稱作

秋七月齊侯使國佐如師己酉及國佐盟于袁婁

屈完曰來盟此其曰如師何來盟者請盟也如師者非請盟也師在鞏矣盟則何爲於袁婁盟於召陵退盟也盟於袁婁進盟也退者以禮進者以力傳曰齊侯使國佐如師晉人不

肯佐怒而歸將復戰晉睨魯衛使請乃相與追焉而盟之乎  
袁婁

八月壬午宋公鮑卒

庚寅衛侯速卒

取汶陽田

晉使齊還魯取者不以好得也介人威力而居有之汶陽田  
者魯故田也何以不曰齊人歸自外曰歸自內曰取

冬楚師鄭師侵衛

十有一月公會楚公子嬰齊于蜀

楚未有稱公子者自嬰齊始傳曰嬰齊爲陽橋之役以救齊  
侵衛遂侵魯師於蜀不書者蓋兵未加魯公懼而往會之也  
不沒公則知凡會盟不曰公者非公也



丙申公及楚人秦人宋人陳人衛人鄭人齊人曹人邾人薛人  
鄆人盟于蜀

會則曰公子嬰齊盟則曰楚人前曰後凡也諸國稱人皆大  
夫也其先楚主盟也○卿大夫稱人恒辭耳傳曰卿不書  
盟也非也

三年春王正月公會晉侯宋公衛侯曹伯伐鄭

傳曰討鄭之役也宋衛未葬皆以爵舉非禮可知

辛亥葬衛穆公

二月公至自伐鄭

甲子新宮災三日哭

新宮者宣宮也何以不稱宣宮主未入也主未入何以不稱  
僖宮主已遷也僖公主已遷因舊宮而新焉新主猶未入於

是災三日哭禮也○宣公薨二十八月矣主猶未入宮綏也  
傳曰壞廟之道易檐可也改塗可也此時新舊之主皆不在  
故曰新宮然是先人棲神之處災而哭焉固其宜也三傳皆  
以爲禮胡氏據劉絢謂宮成主未入不當哭非也李氏光地  
謂新主未入舊主在焉亦恐非檀弓記曰有焚其先人之室  
則三日哭明不必主在始當哭也○記又曰新宮火亦三日  
哭是此經災當爲火如成周宣榭火之例

乙亥葬宋文公

夏公如晉

鄭公子去疾帥師伐許

公至自晉

秋叔孫僑如帥師圍棘

傳曰取汶陽田韃不服故國之凡內獨國者皆叛邑

大雩

晉卻克衛孫良夫伐虜咎如

虜咎如赤狄別種

冬十有一月晉侯使荀庚來聘衛侯使孫良夫來聘丙午及荀庚盟丁未及孫良夫盟

言來聘不言來盟非前定也言及不目其人義繫於盟不繫於人故不目也鄭伯使其弟語來盟不言何人與盟也公子友如齊蒞盟亦不言何人與盟也傳曰不言及者以國與之不言其人亦以國與之○胡氏據劉敞謂庚良夫不繫國者惡其遂事非也來聘已繫國矣

鄭伐許

鄭無人畧辭也。○胡氏以去人爲貶，非也。是年去疾伐許，明年鄭伯伐許，皆無貶，何以獨於此焉？貶杜氏，預謂告辭畧亦非也。鄭人來告，其辭必不曰鄭也，卽書鄭人，亦魯史目之耳。鄭人來告，亦必不自曰鄭人也。方氏苞謂赴告不及傳聞，畧亦非也。列國侵伐多矣，苟無赴告，何得以傳聞？書也。

四年春，宋公使華元來聘。

三月壬申，鄭伯堅卒。

案玉篇云：成公四年，鄭伯緄卒。緄，古干切。是堅，古本作緄也。

公羊釋文云：堅本或作緄。疏云：左氏作堅字，穀梁作實字。今定本亦作堅字。

杞伯來朝。

夏四月甲寅，臧孫許卒。

公如晉。

葬鄭襄公

秋公至自晉

冬城鄆

鄭伯伐許

鄭舉爵者喪未踰年卽吉從戎其父伐人喪其子以喪伐人

二年冬楚鄭侵衛是伐喪也

五年春王正月杞叔姬來歸

仲孫蔑如宋

夏叔孫僑如會晉荀首于穀

梁山崩

梁山晉望也不繫國者名山大澤不以封又地道廣遠變異之應非一國獨當故地震山崩不繫國

秋大水

冬十有一月己酉天王崩

十有二月己丑公會晉侯齊侯宋公衛侯鄭伯曹伯邾子杞伯  
同盟于蟲牢

傳曰鄭服也鄭與許訟而不勝背楚卽晉故爲是盟胡氏曰  
天王崩會盟不廢見其皆不臣

六年春王正月公至自會

二月辛巳立武宮

立者不宜立也武宮者武公之宮武公者去公十一世廟毀  
久矣又立之○杜氏預誤以武宮爲武軍謂季文子以鞏之  
戰立非也

取郕

鄆微國也或曰邾邑非也取邑無不繫國者○方氏苞曰取者取爲附庸也謂內滅書取非也徐人取舒外亦書取滅項內亦書滅以此知滅與取異道也

衛孫良夫帥師侵宋

夏六月邾子來朝

公孫嬰齊如晉

壬申鄭伯薨卒

秋仲孫蔑叔孫僑如帥師侵宋

傳曰晉命也宋旣同麇牢之盟諸侯謀復會宋以內難辭焉晉於是命魯衛侵之○胡氏謂伐也貶而書侵寧有是理

楚公子嬰齊帥師伐鄭

冬季孫行父如晉

晉樂書帥師救鄭

七年春王正月鼯鼠食郊牛角改卜牛鼯鼠又食其角乃免牛

鼯鼠微鼠也牛角如繭栗日展焉見其傷改卜牛又食之游

災也傳曰備災不至非也鼯微矣其爲害無可備

按黃氏震曰鼯鼠甘

口鼠也噬人畜不知痛

吳伐鄭

夏五月曹伯來朝

不郊猶三望

免牛卽不郊矣再言之者免牛在春不郊在夏旣不同時須

備言之○胡氏据朱長文以爲三望僭天子禮然與僖三十

一年傳不合蓋失檢也

秋楚公子嬰齊帥師伐鄭公會晉侯齊侯宋公衛侯曹伯莒子



邾子杞伯救鄭八月戊辰同盟于馬陵

同盟同病楚也傳曰尋麇牢之盟且莒服故也晉自靈公數以大夫主會盟遂失諸侯楚主夏盟近二十年至是景公屢出會盟而諸侯復集

公至自會

吳入州來

州來微國楚所與入之將以撓楚也春伐鄭秋入州來吳始彊也傳曰晉人巫臣爲之也吳以國舉與荆同

冬大雩

衛孫林父出奔晉

八年春晉侯使韓穿來言汶陽之田歸之于齊

戰鞏之後齊服事晉故晉復來言歸其所取汶陽田者魯故

田也歸者取取者歸晉無信齊無義魯無權以是爲市而已  
晉樂書帥師侵蔡

公孫嬰齊如莒

宋公使華元來聘

夏宋公使公孫壽來納幣

納幣常事何以書傳曰錄伯姬也或曰卿納幣非禮也或曰  
禮也

晉殺其大夫趙盾趙盾

秋七月天子使召伯來賜公命

天子天王通稱爾賜與錫同義爾或皆因近似而誤

冬十月癸卯杞叔姬卒

晉侯使士燮來聘叔孫僑如會晉士燮齊人邾人伐郟

衛人來媵

媵淺事耳何以書傳曰錄伯姬又曰三國來媵非禮也古者諸侯三歸二國往媵以姪娣從凡九女唯王后三國媵則十二女○傳曰諸侯嫁女同姓媵異姓否非也若媵必同姓經唯書齊人來媵足矣不必復書衛晉也媵必異姓者以一姓之女不皆宜子故也論語云管氏有三歸包氏咸曰三歸娶三姓女婦人謂嫁曰歸

九年春王正月杞伯來逆叔姬之喪以歸

杞伯來自來也叔姬出未反沒而親逆其喪非禮也或曰叔姬無罪也非也杞辱國耳果若叔姬無罪被出魯人寧受而甘心乎書曰以歸成之爲婦也汪氏克寬曰夫在而逆喪歸葬則自應祔廟與宋襄公母異矣

公會晉侯齊侯宋公衛侯鄭伯曹伯莒子杞伯同盟于蒲  
傳曰爲歸汶陽之田故諸侯貳晉人懼爲是會

公至自會

二月伯姬歸于宋

逆者非卿故不書

夏季孫行父如宋致女

致猶至也女嫁三月而廟見稱婦隨加聘問以安之謂之致  
女常事耳何以書傳曰錄伯姬也或曰卿致女非禮也或曰  
禮也

晉人來媵

伯姬歸宋復來媵者凡媵必送至嫁女之國隨嫡而行

秋七月丙子齊侯無野卒

晉人執鄭伯晉欒書帥師伐鄭

因朝而執也傳曰鄭伯如晉晉人討其貳執之銅鞮而伐之  
冬十有一月葬齊頃公

楚公子嬰齊帥師伐莒庚申莒潰楚人入鄆

伐莒稱嬰齊入鄆稱楚人者前目後凡也方氏苞謂嬰齊在  
莒而以偏師入鄆故書楚人恐非伐莒入鄆兩事也故再舉  
楚人人卽嬰齊也猶之會蜀稱嬰齊盟蜀稱楚人原止一人  
秦人白狄伐晉

鄭人圍許

傳曰示晉不急君也

城中城

中城者或曰東海邑或曰魯內城楚潰莒入鄆迫近魯故城

以備不虞又得時此不爲譏杜氏預曰此閏月城在十一月後也○傳曰非外民胡氏曰譏警守之微皆非也

十年春衛侯之弟黑背帥師侵鄭

傳曰晉命也方氏苞曰其稱弟未有職司而任國之大事也夏四月五卜郊不從乃不郊

夏四月不時也四卜非也況五卜乎傳曰不免牲故言乃不郊非也卜者卜日與牲不從者二事皆不吉也不郊之故乃兼包牲日故須言不郊以見之非止爲不免牲一事也然則鼯鼠食郊牛角旣言免牛又言不郊者閒有異事也彼不郊但爲牲災非日不吉故特言卜牛而已

五月公會晉侯齊侯宋公衛侯曹伯伐鄭

晉侯者孺也傳曰孺有疾立太子州蒲爲君非也州蒲生代

父孺生立子大惡也春秋何故成之○此與邾太子朱儒事  
皆傳誣經者也傳又曰鄭人改立君晉伐鄭而歸鄭伯若然  
經何不書也

齊人來媵

丙午晉侯孺卒

秋七月公如晉

傳曰晉人止公送葬蓋魯人辱之故不書葬非孔子削之也  
冬十月

十有一年春王三月公至自晉

晉侯使卻棼來聘己丑及卻棼盟

晉人止公凡九月懼公歸而貳也使卻棼隨加聘問棼因以  
便宜結盟稱及者與荀庚同

夏季孫行父如晉

秋叔孫僑如如齊

冬十月

十有二年春周公出奔晉

傳曰自周無出非也天王之出也鄭也周公之出也晉也凡王居內地則不言出臣自外奔亦不言出周公何以奔傳曰惡惠襄之偏且與伯與爭政也

夏公會晉侯衛侯于瑱澤

傳曰宋華元克合晉楚之成非也經無楚也又曰鄭伯如晉聽成會于瑱澤成故也非也經又無鄭也

秋晉人敗狄于交剛

冬十月



十有三年春晉侯使卻錡來乞師

言乞者重師也又明列國之體不相統壹非王命而徵師皆非禮故內外通曰乞

三月公如京師

朝也何以不言朝書如京師則朝不待言也踐土河陽言王所故須言朝京師不言王所故不言朝也雖朝而非特朝道過也或曰書如者不與朝也非也內書朝曰如公如齊如晉如楚皆朝也

夏五月公自京師遂會晉侯齊侯宋公衛侯鄭伯曹伯邾人滕人伐秦

書公自京師者著實也不書公自京師則無以見會諸侯於京師又無以見諸侯皆朝於京師也書遂會者亦著實也不

書遂會則疑朝王與會伐爲兩事也遂者繼事之辭此雖繼事實本事也

曹伯廬卒于師

案檀弓記曰諸侯伐秦曹桓公

桓經作宣

卒於會諸侯請含使之

襲此可見諸侯卒于師之禮

秋七月公至自伐秦

不以京師致者道過也

冬葬曹宣公

十有四年春王正月莒子朱卒

范氏甯曰徐邈云葬皆稱諡莒君無諡故終春秋不葬。懿行按傳稱渠丘公犂比公皆號也知無諡

夏衛孫林父自晉歸于衛

歸或言復或不言復文有詳畧耳或曰大夫無復道故復歸  
爲惡歸爲善非也復歸爲惡晉趙鞅叛也何以歸不言復方  
氏苞謂復歸爲難歸爲易亦非也復歸爲難衛元咺歸自晉  
無難矣何以言復宋華元亦歸自晉無以見爲不難也何以  
不言復

秋叔孫僑如如齊逆女

鄭公子喜帥師伐許

九月僑如以夫人婦姜氏至自齊

一事而再見者卒名之僑如不氏前已見也夫人稱婦有姑  
辭也穆姜存焉耳稱氏異於不稱氏者何詳畧辭耳趙氏匡  
謂書氏傳寫誤衍未必然也或曰無貶也非也夫人非臣子  
所當貶氏與不氏又非褒貶所在也

冬十月庚寅衛侯臧卒

秦伯卒

十有五年春王二月葬衛定公

三月乙巳仲嬰齊卒

嬰齊者何不知也其稱仲蓋於歸父爲子行而襄仲之孫也  
孫以王父字爲氏也傳曰爲人後者爲之子仲嬰齊者後歸  
父也非也弟後兄是孫亦可父祖乎歸父家遺嬰齊蓋以庶  
孫後仲遂故世稱仲氏○方氏苞謂是時魯有二嬰齊皆公  
孫使其卒書公孫嬰齊則與十七年卒狸服者無以知爲兩  
人故魯人以仲爲別而舊史因之非也卿卒皆書氏而嬰齊  
獨以與人同名變而書字則非義所安且魯人私立號名以  
相識別何足登於春秋乎若二嬰齊果皆公孫氏於其卒也

皆書公孫嬰齊亦何嫌爲非兩人而必瑣瑣然別之也

癸丑公會晉侯衛侯鄭伯曹伯宋世子成齊國佐邾人同盟于戚晉侯執曹伯歸于京師

盟于戚討曹也傳曰曹宣公卒負芻殺太子而自立三年矣稽討也又盟焉盟則不當討討則無與盟盟而執之非禮也歸于京師正也凡執諸侯或稱爵或稱人何也義繫於執不繫於稱爵稱人凡執稱人畧辭也以爲不必別也其或稱爵便文也以爲不得不別也晉侯入曹執曹伯則稱爵蒙上文也若入曹稱爵執稱人則疑親執者非晉侯也此同盟于戚執曹伯則稱爵亦蒙上文也若同盟稱爵執稱人則疑親執者非晉侯也二者皆辭有所窮也外此無稱爵者矣傳曰稱爵以執者霸討稱人以執者非霸討非也凡稱爵稱人非褒

貶所在春秋不以爵爲賤人爲貶。○既盟於戚然後執曹伯是盟而後執兩事也。故必再言晉侯會於孟執宋公是因會而執一事也。又在會諸侯同執之故不得再言楚子

公至自會

夏六月宋公固卒

楚子伐鄭

秋八月庚辰葬宋共公

宋華元出奔晉宋華元自晉歸于宋宋殺其大夫山宋魚石出奔楚

傳曰華元相宋蕩山弱公室殺子肥於是華元恥之走之晉山不氏從告辭也魚石者山族也走之楚傳曰魚石止華元於河上反而歸非也若華元實未至晉經何得書自晉歸也

○方氏苞曰再書華元與良霄自許入鄭異辭正爲晉宋懸隔千里奔晉歸宋非一時事不得不再舉華元許鄭接壤良霄方出卽入不得再舉良霄皆因事屬辭以著其實也○又曰宣成而後外大夫無不氏者而宋山獨不氏從告辭也其國惡之故告不以氏謂春秋削之非也弑君之賊無不氏而山以背族削氏則其類頗矣

按後一條見方氏春秋通論

冬十有一月叔孫僑如會晉士燮齊高無咎宋華元衛孫林父鄭公子魋邾人會吳于鍾離

會又會者兩會也吳子彊諸侯之大夫不敢致其來爲會以謀之於是乎相率以往鍾離者楚邑也迫近吳就而與之會傳曰殊會吳外之非也卽外吳者何以不外楚

許遷于葉

十有六年春王正月雨木冰

不雪而雨溫也既雨而冰寒也上溫而下寒雨著木成冰或曰木緣或曰木介也。胡氏據何休云木少陽冰兵象冰齧木大臣執兵之徵鑿矣

夏四月辛未滕子卒

鄭公子喜帥師侵宋

六月丙寅朔日有食之

晉侯使欒黶來乞師

甲午晦晉侯及楚子鄭伯戰于鄆陵楚子鄭師敗績

戰稱將敗稱師常也此何以書楚子凡君敗稱君師敗稱師舉其甚者此敗者楚子耳矢集於其目然則泓之敗宋公傷股何以稱師師敗甚也抑或楚子當爲楚師文誤耳



楚殺其大夫公子側

秋公會晉侯齊侯衛侯宋華元邾人于沙隨不見公

既曰公會矣又曰不見公何也會者其志也不見者其事也諸侯爲期謀伐鄭公會焉而之乎沙隨晉侯信讒而嫌公不見也傳曰鄆陵之戰魯後師期僞如訴公於晉侯。沙隨不見公平且不與盟直書無隱胡氏遂謂二役曲不在公故不諱非也卽曲在公亦不得諱也諱則沒其實矣

公至自會

公會尹子晉侯齊國佐邾人伐鄭

尹氏王卿士子爵未有以王臣會伐者於是始

曹伯歸自京師

執而歸者名此何以不名陵氏助曰諸侯失地反國則名曹

伯在京師而王不黜之是不失國故不名也

九月晉人執季孫行父舍之于荅丘

執未有言舍之于者此其言之何舍者釋也舍之于荅丘明乎未嘗執以歸耳或曰舍寘也

冬十月乙亥叔孫僑如出奔齊

十有二月乙丑季孫行父及晉卻鞮盟于扈

公至自會

高氏閔曰內大夫執則政行父不致者公待行父偕歸畢公爲重也

乙酉刺公子偃

偃之罪未有聞焉爾傳曰穆姜私乎僑如欲去季孟公難之姜怒適偃來前指之曰汝不可者吾使是爲君而去之公疑

是言歸而刺之然則其與刺公子買異辭何也方氏苞曰成衛不卒戍刺買之獄辭也故舊史據而書之若偃之刺其故不可言也刺之亦不能言其故也直書刺而已

十有七年春衛北宮括帥師侵鄭

夏公會尹子單子晉侯齊侯宋公衛侯曹伯邾人伐鄭

六月乙酉同盟于柯陵

不目諸侯尹單與盟也未有王臣與盟而稱同者於是始

秋公至自會

齊高無咎出奔莒

九月辛丑用郊

九月不時甚也用郊者不卜日不卜牲直郊而已。劉氏倣以用爲用人以祭恐非也昭十年季平子始用人於亳社

晉侯使荀罃來乞師

冬公會單子晉侯宋公衛侯曹伯齊人邾人伐鄭

晉未能服鄭三假王命以臨之鄭人卒不服。方氏苞曰齊書人非卿也自成以後列國之卿會盟侵伐皆以名見其不名者非卿也。懿行謂外卿大夫恒稱人或名或不名史有詳畧耳未必如方氏所說

十有一月公至自伐鄭

壬申公孫嬰齊卒于貍服

從公伐鄭歸也道疾而卒蘇氏轍曰大夫卒不地其地在外也杜氏預曰十一月無壬申日誤也。案公穀傳竝以壬申爲十月十五日也以爲待公至然後卒大夫故十月之日書在十一月之下非也月日顛倒史無此例上書昭公孫于齊

下書叔孫婼卒非待公至然後卒大夫也

十有二月丁巳朔日有食之

邾子貜且卒

晉殺其大夫卻錡卻犇卻至

一朝而尸三卿傳曰胥童爲之也未幾亦誅死

楚人滅舒庸

十有八年春王正月晉殺其大夫胥童

庚申晉弑其君州蒲

傳曰欒書荀偃使程滑弑也何以不書凡傳所據者或傳聞異辭經既不書則未知傳之信否也春秋不以疑加人竹書紀年又云晉厲公卒復不言弑。孔疏引應劭云周穆王名滿晉厲公名滿是同名不諱今作滿豈誤與

齊殺其大夫國佐

公如晉

夏楚子鄭伯伐宋魚石復入于彭城

入者逆辭也不言納者楚鄭自伐宋本不爲納魚石石自乘

亂而入故不言納

據公孫寧儀行父言納見宣十一年

公至自晉

晉侯使士匄來聘

秋杞伯來朝

八月邾子來朝

築鹿囿

囿者禽府也鹿者其名也築者爲牆也虞民利非正罷民力  
不時其後昭築卽囿定築蛇淵囿

己丑公薨于路寢

冬楚人鄭人侵宋

晉侯使士魴來乞師

十有二月仲孫蔑會晉侯宋公衛侯邾子齊崔杼同盟于虛打  
傳曰謀救宋也

丁未葬我君成公

春秋說略卷八

春秋說略卷九

棲霞郝懿行學

海陽趙銘彝校刊

襄公

元年春王正月公卽位

仲孫蔑會晉欒黶宋華元衛甯殖曹人莒人邾人滕人薛人圍宋彭城

彭城繫宋者傳曰爲宋討故繫宋非也凡邑無不繫國者卽非爲宋討猶當繫宋也然則魚石入彭城何以不繫宋蒙伐宋文也

夏晉韓厥帥師伐鄭仲孫蔑會齊崔杼曹人邾人杞人次于郕伐者討貳也次者援伐也

秋楚公子壬夫帥師侵宋

案此與五年經左公穀並作壬夫顏師古匡謬正俗獨以壬夫爲王夫無



據謬

九月辛酉天王崩

邾子來朝

冬衛侯使公孫剡來聘晉侯使荀躒來聘

天王崩朝聘不廢者杜氏預曰辛酉九月十五冬者十月初也訃未至魯不爲非禮。懿行謂杜氏亦臆度耳冬者總舉一時何以知爲十月初也若王訃已至則此當與蟲牢義同

咸五年

二年春王正月葬簡王

鄭師伐宋

夏五月庚寅夫人姜氏薨

六月庚辰鄭伯輪卒

晉師宋師衛甯殖侵鄭

非伐喪也稱師者將卑稱將者師少

秋七月仲孫蔑會晉荀偃宋華元衛孫林父曹人邾人于戚  
己丑葬我小君齊姜

叔孫豹如宋

冬仲孫蔑會晉荀偃齊崔杼宋華元衛孫林父曹人邾人滕人  
薛人小邾人于戚遂城虎牢

城邑不繫國何也城不繫鄭戍繫鄭互見也城若繫鄭無以  
見爲難鄭也戍若不繫鄭無以見爲鄭邑也城虎牢何以爲  
難鄭虎牢者巖邑鄭之吭也可以扼鄭可以制楚諸侯討鄭  
而不服於是乎城之而楚不爭鄭不叛天下息兵者六年○  
方氏苞謂虎牢不繫鄭者城楚上棘陵皆不繫國蓋職方具

在書某地即知爲某國非也春秋滅國五十二惡觀職方具在也謂楚上緣陵不繫國而外此無不繫國也楚上緣陵得

非闕文與

僖二年及十四年

楚殺其大夫公子申

三年春楚公子嬰齊帥師伐吳

公如晉

夏四月壬戌公及晉侯盟于長檣

公如晉始朝也非禮也童子侯不朝王公卽位時年四歲長檣近晉地也出其國都而外盟禮也謙以接同列

公至自晉

公本爲朝不爲盟故不以長檣致

六月公會單子晉侯宋公衛侯鄭伯莒子邾子齊世子光己未

同盟于雞澤

同盟者鄭服也盟王官非禮也杜氏預曰靈王新立使王官伯出盟諸侯安王室故無譏

陳侯使袁僑如會

如會者後會也

戊寅叔孫豹及諸侯之大夫及陳袁僑盟

及以及何也豹及諸侯之大夫先受命於其君而後及乎袁僑以大夫盟大夫禮也袁僑免乎伉諸侯免乎卑。方氏荀曰諸侯在則大夫不列序屬辭之體也救徐盟泃梁皆然

秋公至自會

冬晉荀偃帥師伐許

四年春王三月己酉陳侯午卒

夏叔孫豹如晉

秋七月戊子夫人妣氏薨

齊姜夫人矣又一夫人也以是爲厲爾

葬陳成公

八月辛亥葬我小君定姒

冬公如晉

陳人圍頓

五年春公至自晉

夏鄭伯使公子發來聘

叔孫豹鄆世子巫如晉

傳曰成屬鄆也不言及不知也傳曰比諸魯大夫恐非也

此與下一條俱不言及或俱闕文二事外更無其比

仲孫蔑衛孫林父會吳于善道

不言及者杜氏預曰魯衛俱受命於晉故不言及恐非也又曰吳先在善道二大夫往會之故曰會吳

秋大雩

楚殺其大夫公子壬夫

公會晉侯宋公陳侯衛侯鄭伯曹伯莒子邾子滕子薛伯齊世子光吳人鄫人于戚

吳魯善道不稱人皆辭耳此稱人便文耳不可曰吳鄫人也鄫與會魯不利也此不殊會吳何也鍾離往而卽吳故殊會戚則來而聽命故不殊會也

公至自會

冬戍陳

會于戚命戍陳也戍陳何以不目諸侯傳曰離至不可得而序故言我也諸侯在會受命各還國遣戍不時至故獨書魯

戍虎牢亦然

見十年冬

楚公子貞帥師伐陳公會晉侯宋公衛侯鄭伯曹伯齊世子光救陳

十有二月公至自救陳

辛未季孫行父卒

六年春王三月壬午杞伯姑容卒

夏宋華弱來奔

秋葬杞桓公

滕子來朝

莒人滅鄆

病晉悼也傳曰立異姓以爲後謬也

冬叔孫豹如邾

季孫宿如晉

傳曰晉以鄆故來討也

十有二月齊侯滅萊

七年春邾子來朝

夏四月三卜邾不從乃免牲

三卜禮也夏四月不時也傳曰啟蟄而郊

啟蟄在建寅之月

小邾子來朝

城費

費季氏邑也行父相三君而無私積宿初嗣位首城私邑不

臣見矣自僖公賜季友汶陽田及費此季氏所以強宿使南



遺城費此陪臣所以強季孫斯帥師墮費此陪臣所以亡季氏所以弱

秋季孫宿如衛

八月螽

冬十月衛侯使孫林父來聘壬戌及孫林父盟

楚公子貞帥師圍陳

十有二月公會晉侯宋公陳侯衛侯曹伯莒子邾子于鄆

杜氏預曰謀救陳陳侯逃歸不成救故不書救也

鄭伯髡頑如會未見諸侯丙戌卒于鄆

鄭伯何以生名卒名也卒名加之如會之上便文爾未見諸侯何以書著實也鄆鄆皆鄭地若但書如會則疑於已見諸侯歸而卒矣若已見諸侯則不必書也陳侯如會袁僑如會

是也三傳皆曰此弑也吾以經斷之曰此卒也非弑也奚以明其然也鄭伯適以如會未見諸侯而暴卒三傳既見經如此書矣而傳聞者同口而疑之於是信其疑而目之曰弑也左氏曰子駒使賊弑也公羊曰大夫欲從楚者弑也穀梁曰其臣欲從楚者弑也然則親弑君者竟誰乎其爲傳疑亦明矣何足信乎或曰凡弑君者赴告之辭皆有以自文春秋或書卒或書弑書弑不疑者也書卒疑者也非也春秋推見至隱聖人博議多聞凡所書者皆爲萬世傳信未有疑而筆於書者也且夫弑逆大惡也如實不弑君者非可失入而書之曰弑也如實弑君者獨可失出而書之以卒乎以疑而入人罪與以疑而出人罪皆非所以傳信也此經書鄭伯未見諸侯而卒辭理明白本無可疑者三傳乃自生疑並以疑誣經

耳故曰吾以經斷之此卒也非弑也傳曰諱也非也劉氏微  
曰從赴書卒見鄭無臣子也非也方氏苞曰書未見諸侯所  
以發人之疑也非也審如是則無爲傳信也

陳侯逃歸

八年春王正月公如晉

夏葬鄭僖公

鄭人侵蔡獲蔡公子燮

季孫宿會晉侯鄭伯齊人宋人衛人邾人于邢丘

何以會傳曰命朝聘之數也公在晉何以使宿會重煩諸侯  
使大夫聽命也鄭伯何以親之獻捷也皆何以稱人大夫稱  
人恒辭也傳曰尊晉侯也不以大夫敵盟主非也大夫敵盟  
主多矣何獨此或曰貶也諸侯在而大夫會非也大夫稱人

不爲貶

公至自晉

莒人伐我東鄙

秋九月大雩

冬楚公子貞帥師伐鄭

晉侯使士匄來聘

九年春宋災

夏季孫宿如晉

五月辛酉夫人姜氏薨

秋八月癸未葬我小君穆姜

冬公會晉侯宋公衛侯曹伯莒子邾子滕子薛伯杞伯小邾子齊世子光伐鄭十有二月己亥同盟于戲

同盟者鄭服也何以不致繼有事也傳曰恥不能據鄭非也  
于鄆不致以繼會邢上故于戲不致以繼會祖故

楚子伐鄭

十年春公會晉侯宋公衛侯曹伯莒子邾子滕子薛伯杞伯小  
邾子齊世子光會吳于柤

會又會猶鍾離也傳曰外之非也吳在相晉以諸侯往會之  
結吳所以撓楚也吳者楚之臂也楚用則楚彊晉用則晉彊  
晉欲致鄭則楚人議其後得吳則吳人議楚後晉角之吳撓  
之楚也疲晉也逸自是三駕而楚不爭然吳亦由此浸浸彊  
夏五月甲午遂滅偃陽

因會而滅之故曰遂滅之蓋以通吳道也

公至自會

楚公子貞鄭公孫輒帥師伐宋

晉師伐秦

法氏坤宏曰秦附楚故也晉通吳以制楚楚援秦以敵晉

秋莒人伐我東鄙

公會晉侯宋公衛侯曹伯莒子邾子齊世子光滕子薛伯杞伯

小邾子伐鄭

冬盜殺鄭公子駢公子發公孫輒

凡兩下相殺稱名不得其主名則稱盜盜者陰賊之辭也何以不曰盜殺鄭大夫嫌也大夫者對君之稱非所施於盜也然則盜殺蔡侯申何以稱爵不稱爵則不知爲蔡君也傳曰賤者窮諸盜非也賤者之名不著於春秋常也殺君大夫雖賤當書名變也傳曰尉止等五族作亂殺之卽如是何以不

名

戌鄭虎牢

虎牢繫鄭何以知非鄭服而爲鄭戌之也以下書楚公子貞救鄭知之也

楚公子貞帥師救鄭

公至自伐鄭

十有一年春王正月作三軍

作爲也軍萬二千五百人也三軍大國也魯二軍今增其一蓋作中軍也何以謂之作三軍毀舊乘從新制或曰魯故三軍矣言作者以私易公也三分之各取一蓋自是兵去公室矣古者有公兵無私兵有事三卿更將事畢將歸朝車歸甸兵歸邑古者家不藏甲以爲大夫不得尸兵也。方氏苞曰

作三軍者季氏自爲一軍孟叔共爲一軍而公徒爲中軍也  
謂三桓各有一軍者誤

夏四月卜郊不從乃不郊

不從者牲日皆不吉也故不書免牲惟書不郊而已或曰卜  
免牲不吉而不敢免也然則僖三十一年亦四卜郊不從書  
免牲何也行免牲之禮也彼蓋牲不吉非日不吉故但書免  
牲既免牲則不郊可知故不言乃不郊也

鄭公孫舍之帥師侵宋

公會晉侯宋公衛侯曹伯齊世子光莒子邾子滕子薛伯杞伯  
小邾子伐鄭

秋七月己未同盟于亳城北

杜氏預曰亳城鄭地伐而書同盟鄭與盟可知非也陵氏助



曰戲毫二盟鄭皆不與蓋諸侯自相盟亦非也戲盟鄭與故下書楚子伐鄭毫盟鄭不與故下書楚鄭伐宋

公至自伐鄭

楚子鄭伯伐宋

公會晉侯宋公衛侯曹伯齊世子光莒子邾子滕子薛伯杞伯小邾子伐鄭會于蕭魚

伐鄭會蕭魚鄭成也會而不盟不必盟也自是鄭不叛者二十  
四年三駕之功也初晉悼三年四伐鄭不得志荀偃曰善  
師不陳善陳不戰吾三分四軍更出肆楚則不戰而疲也公  
從之楚以敝其後北方小安兵革息

公至自會

致會不致伐何也大蕭魚之會故告廟而以會致

楚人執鄭行人良霄

冬秦人伐晉

十有二年春王三月莒人伐我東鄙圍台季孫宿帥師救台遂入鄆

大夫無遂事遂者專之也

夏晉侯使士魴來聘

秋九月吳子乘卒

冬楚公子貞帥師侵宋

公如晉

十有三年春公至自晉

夏取郛

郛國也取者取爲附庸也故不言滅傳曰郛亂分爲三晉故

邾遂取之

秋九月庚辰楚子審卒

冬城防

十有四年春王正月季孫宿叔老會晉士匄齊人宋人衛人鄭公孫麇曹人莒人邾人滕人薛人杞人小邾人會吳于向

魯二卿並會卿介卿也此皆大夫矣或名之或人之蓋舊史之文有詳畧耳非義例也小國大夫與會盟終春秋無以名見者舊史畧之也傳曰齊宋大夫不書情也衛北宮括書於伐秦攝也非也春秋不以書人爲貶方氏苞曰成公以後稱人者非卿也亦非也卿大夫稱人恒辭耳會于向爲吳也伐秦報伐也會與伐君不親之悼德衰矣自是凡役皆大夫二月乙未朔日有食之

夏四月叔孫豹會晉荀偃齊人宋人衛北宮括鄭公孫蠆曹人莒人邾人滕人薛人杞人小邾人伐秦

己未衛侯出奔齊

衛侯衎也林父逐君不書者春秋書奔不書逐也。胡氏於君奔君弑多爲偏貴君之辭害義傷教不可以訓

莒人侵我東鄙

秋楚公子貞帥師伐吳

冬季孫宿會晉士句宋華閱衛孫林父鄭公孫蠆莒人邾人于戚

傳曰謀定衛也。萬氏斯大曰此與會稷成宋亂無異不書成衛亂者孫林父在會不書亂而成亂自明也

十有五年春宋公使向戌來聘二月己亥及向戌盟于劉

劉夏逆王后于齊

劉氏夏名稱名非卿也逆后不使卿非禮也逆后常事不書非禮則書若其不告雖當書亦不書也此書逆不書歸或齊不告與

夏齊侯伐我北鄙圍成公救成至遇

季孫宿叔孫豹帥師城成郛

秋八月丁巳日有食之

邾人伐我南鄙

冬十有一月癸亥晉侯周卒

十有六年春王正月葬晉悼公

三月公會晉侯宋公衛侯鄭伯曹伯莒子邾子薛伯杞伯小邾子于溴梁戊寅大夫盟

晉平速葬卽吉太不懷也諸侯會而大夫盟君失政也杜丘

之大夫繫諸侯

僖十五年

雞澤之大夫繫諸侯

見三年

此其不繫何

省文耳閒無異事故不須復言諸侯或曰不繫諸侯者大夫  
不臣也非也卽繫諸侯無以見大夫臣也或曰盟齊高厚以  
大夫敵大夫也非也卽盟齊高厚何不書如陳袁僞也

晉人執莒子邾子以歸

傳曰以我故且通齊楚之使執諸侯未有以歸者以歸非禮  
也十九年執邾子不言以歸者旋釋之也

齊侯伐我北鄙

夏公至自會

五月甲子地震

叔老會鄭伯晉荀偃衛甯殖宋人伐許

荀偃主兵序鄭伯下不以大夫先諸侯也

秋齊侯伐我北鄙圍鄆

大雩

冬叔孫豹如晉

十有七年春王二月庚午鄆于甯卒

宋人伐陳

夏衛石買帥師伐曹

秋齊侯伐我北鄙圍桃高厚帥師伐我北鄙圍防

齊三年而五伐弱晉卑魯也明年卒致十二國之圍

九月大雩

宋華臣出奔陳

冬邾人伐我南鄙

十有八年春白狄來

杜氏預曰不言朝不能行朝禮

夏晉人執衛行人石買

行人者官也執或官或不官何也著其實也執行人非禮也傳曰爲曹故。方氏苞曰不書行人以本事執者也書行人不以本事執者也非也官非行人也安得書行人官行人也安得不書行人春秋非以其事別也

秋齊師伐我北鄙

冬十月公會晉侯宋公衛侯鄭伯曹伯莒子邾子滕子薛伯杞伯小邾子同圍齊

國未有稱同者齊靈怙彊佳兵諸侯同疾之

曹伯負芻卒于師



楚公子午帥師伐鄭

十有九年春王正月諸侯盟于祝柯

圍齊之諸侯也不序前目後凡也

晉人執邾子

公至自伐齊

此圍也以伐致圍伐一耳

取邾田自漚水

取者不以道得也介人之力據人之田邾田者非魯故田也  
自漚水以漚水爲界也取者多畧不數也傳曰漚移非也以  
移而正之不當坐取田

季孫宿如晉

葬曹成公

夏衛孫林父帥師伐齊

秋七月辛卯齊侯環卒

晉士句帥師侵齊至穀聞齊侯卒乃還

穀齊地侵者其志也至者未侵也還者事已畢也此事未畢善其畢所未畢也畢則伐喪矣專之可傳曰外專君命故非之非也

八月丙辰仲孫蔑卒

齊殺其大夫高厚

鄭殺其大夫公子嘉

冬葬齊靈公

城西郭

叔孫豹會晉士句于柯

城武城

二十年春王正月辛亥仲孫速會莒人盟于向

釋舊怨也仲孫速者蔑之子未練而從政非禮也古者臣有大喪君三年不呼其門閔子騫要紼事退而致仕孔子善之記曰君子不奪人喪亦不可奪喪也

夏六月庚申公會晉侯齊侯宋公衛侯鄭伯曹伯莒子邾子滕子薛伯杞伯小邾子盟于澶淵

傳曰齊成故也

秋公至自會

仲孫速帥師伐邾

蔡殺其大夫公子燮蔡公子履出奔楚

陳侯之弟黃出奔楚

稱弟者未官也傳曰楚人使蔡無常公子變欲從晉蔡人殺之履其母弟也走之楚陳慶虎慶寅畏公子黃之偪愬諸楚曰與變同謀黃亦奔而自理

叔老如齊

冬十月丙辰朔日有食之

季孫宿如宋

二十有一年春王正月公如晉

邾庶其以漆閭丘來奔

小國大夫恒稱人而特以事見雖賤必書名屬辭之體也傳曰重地非也卽不重地亦當書名不書名則不知孰誰也漆閭丘二邑也大小敵故不言及以邑出爲叛其言來奔內辭

也魯登三叛人

邾庶其莒牟夷黑肱見昭五年及三十一年

夏公至自晉

秋晉欒盈出奔楚

九月庚戌朔日有食之

冬十月庚辰朔日有食之

歷家言日無頻月食此與二十四年皆頻月食

曹伯來朝

公會晉侯齊侯宋公衛侯鄭伯曹伯莒子邾子于商任

二十有二年春王正月公至自會

夏四月

秋七月辛酉叔老卒

冬公會晉侯齊侯宋公衛侯鄭伯曹伯莒子邾子薛伯杞伯小

邾子于沙隨

商任沙隨二會傳曰銅鞮盈也盈出矣又極之所往士句尸之也明年盈入晉幾亂國

公至自會

楚殺其大夫公子追舒

二十有三年春王二月癸酉朔日有食之

三月己巳杞伯句卒

夏邾畀我來奔

葬杞孝公

陳殺其大夫慶虎及慶寅

慶氏專國奔君之弟其罪大矣傳曰以陳叛爲國人所殺不書不告也稱及者以貴及賤也慶誅而黃歸矣

陳侯之弟黃自楚歸于陳

晉欒盈復入于晉入于曲沃

復入者逆辭也曲沃邑也入爲亂言入晉又言入曲沃者先後之辭傳曰由曲沃而入非也卽如是經當先書入曲沃後書入晉

秋齊侯伐衛遂伐晉

八月叔孫豹帥師救晉次于雍榆

齊伐晉助欒氏也遂以伐事之次也救而次有畏也不成救也畏晉而憚齊

己卯仲孫速卒

冬十月乙亥臧孫紇出奔邾

晉人殺欒盈

傳曰范氏殺之也稱晉人者以國殺告也不言大夫非大夫

也出奔位已絕

齊侯襲莒

襲者掩也未有言襲者君而襲君病矣

二十有四年春叔孫豹如晉

仲孫羯帥師侵齊

傳曰晉故也仲孫羯者速之子未練而從戎非禮也古者臣有大喪已練可以弁冕服金革之事

夏楚子伐吳

秋七月甲子朔日有食之既

齊崔杼帥師伐莒

大水

八月癸巳朔日有食之



公會晉侯宋公衛侯鄭伯曹伯莒子邾子滕子薛伯杞伯小邾子于夷儀

冬楚子蔡侯陳侯許男伐鄭

傳曰伐鄭以救齊○鄭孱國也子產相之楚不能難晉不加兵國有人故也

公至自會

陳鍼宜咎出奔楚

叔孫豹如京師

傳曰聘且賀城城者何齊人城郊郊者王城也於是穀洛鬪毀王宮齊城之不書不告也○會於夷儀傳曰將伐齊水不克蓋齊懼故城以說王耳凡魯聘王皆因事而往此無事故傳云然魯聘王止此

大饑

傳曰五穀不升爲大饑

二十有五年春齊崔杼帥師伐我北鄙

夏五月乙亥齊崔杼弑其君光

公會晉侯宋公衛侯鄭伯曹伯莒子邾子滕子薛伯杞伯小邾子于夷儀

六月壬子鄭公孫舍之帥師入陳

秋八月己巳諸侯同盟于重丘

崔杼弑君會於夷儀將討之以賂故不克盟于重丘以定之  
同者有同也同黨賊

公至自會

衛侯入于夷儀

有二衛侯此何衛侯也衍也會夷儀者剽也然則孰正曰衍正正則何以不名別有見也然則突入櫟何以名後不復見也下書衛侯衍復歸于衛則入夷儀不名可也後不書鄭伯突復歸于鄭則入櫟名可也或曰突不正也故名衍正也故不名非也名與不名何足以見正不正也或曰名不名從告辭也

楚屈建帥師滅舒鳩

冬鄭公孫夏帥師伐陳

十有二月吳子遏伐楚門于巢卒

吳子何以生名卒名也門者門之也巢國也門巢何以卒傳

曰吳子好勇而輕巢人誘之親門焉射之卒

二十有六年春王二月辛卯衛甯喜弑其君剽

衛孫林父入于戚以叛

據七背君曰叛杜氏預曰衍雖未居位林父專邑背國猶爲叛也

甲午衛侯衍復歸于衛

剽不正何以稱君君之爾衍正矣何以名失國爾

夏晉侯使荀吳來聘

公會晉人鄭良霄宋人曹人于澶淵

傳曰來聘召公也會于澶淵以討衛疆戚田晉黨逆獎亂公

降尊毀列或名之或人之與會向伐秦義同

見十四年

○傳曰趙

武不書尊公也向戚不書後也非也名之人之此自史有詳

畧耳非義例也鄭先宋蓋先至故也齊世子光先滕薛杞莒

亦然

見十年十一年

秋宋公殺其世子痤

晉人執衛甯喜

孫林父甯喜罪一也晉於林父右之於甯喜執之邾氏敬曰  
晉非執弑君也執不附己者

八月壬午許男甯卒于楚

冬楚子蔡侯陳侯伐鄭

葬許靈公

二十有七年春齊侯使慶封來聘

夏叔孫豹會晉趙武楚屈建蔡公孫歸生衛石惡陳孔奐鄭良  
霄許人曹人于朱

傳曰宋向戌欲弭兵爲名爲此會且令晉楚之從交相見自  
是南北二霸天下多事向戌爲之也弭兵大事也會何以無

諸侯政在大夫也會何以無宋地於宋宋與盟可知傳曰楚

先歃經先晉者盟則先楚會則先晉會號亦然

見昭元年

趙氏

汧曰周制以班爵爲序歃血則先同姓說見定四年是盟與會次序本異今屈建所爭者歃血之先後耳其大夫之會楚固未嘗先晉也傳曰書先晉晉有信也考之已不詳杜預曰蓋孔子追正之亦非傳意

衛殺其大夫甯喜衛侯之弟鱄出奔晉

殺甯喜者非討賊也討其專也初獻公求反國於喜喜曰鱄也來無用盟於是鱄往約曰政由甯氏祭則寡人公既反而患其專殺之鱄走之晉織絢邯鄲終身不言衛鱄稱弟非大夫也信不近義言不復鱄之約非義矣君兄無絕道至於誓衛不反過矣

秋七月辛巳豹及諸侯之大夫盟于宋

豹不氏者前已見也會盟同地再言之者別於異地也

冬十有二月乙亥朔日有食之

二十有八年春無冰

夏衛石惡出奔晉

邾子來朝

秋八月大雩

仲孫羯如晉

冬齊慶封來奔

十有一月公如楚

十有二月甲寅夫主崩

乙未楚子昭卒

胡氏曰甲寅乙未相距四十二日則閏月之驗也不書閏者  
范甯云承前月而受其餘日故書閏月之口繫前月之下或  
曰喪不數閏春秋兩書閏皆爲非禮而書其得禮則不書也  
○李氏光地曰以去年十二月乙亥朔推之此年十二月有  
乙未無甲寅胡氏說雖善但此年實無閏當從左氏爲確蓋  
甲寅以傳寫偶誤耳案去年十二月乙亥朔日有食之左氏  
作十一月傳口辰在中訛歷過也再失  
問矣是左氏謂去年有閏也孔穎達曰杜以長歷推  
之乙亥是十一月朔非十二月也知傳是而經誤  
二十有九年春王正月公在楚

公在楚何以書以正月書也三始之正嘉禮所重朝正於廟  
人理自新敝君不在故特存之然則公以朝會正月在外者  
多矣成公如晉晉人止公送葬不書公在晉內晉也此楚人  
止公送葬書公在楚外楚也案檀弓記曰襄公朝於荆康王



卒荆人曰必請襲魯人曰非禮也荆人強之巫先拂柩荆人悔之是楚止公送葬之事

夏五月公至自楚

庚午衛侯衎卒

闕弑吳子餘祭

閭門者也不稱姓名無人道非人也不稱其君非人也何有君然則何以稱弑閭食祿也無人道有臣道○傳曰闕越俘也若本吳人當書吳闕弑其君餘祭不得云闕弑吳子也傳曰近刑人輕死之道也

仲孫羯會晉荀盈齊高止宋華定衛世叔儀鄭公孫段曹人莒人滕人薛人小邾人城杞

傳曰晉平公杞出也故城之動大衆私母家故曰晉棄諸姬

而屏夏肄

晉侯使士鞅來聘

杞子來盟

傳曰來聘者拜城且治杞田也故來盟繼之杞子蓋杞伯之

誤以卒稱杞伯不合生稱杞子

案杞伯卒見昭六年

吳子使札來聘

吳子者餘祭也爵舉者便文耳不可曰吳使又不可曰吳人使也或曰始進之非也不稱公子與楚椒同吳未有來聘者於是驟彊交上國其後遂主諸侯會盟○杜氏預曰吳子旣遣使而後遇弑札以六月到魯未聞喪不稱公子其禮未同於上國此說是也公穀以使札爲賢胡氏以去公子爲貶皆非也經書吳子使札來聘見吳驟彊耳與楚子使椒秦伯使

術亦有何異緣一札字妄生褒貶於經無當又札讓國在後  
日吳亂亦非札致何緣預貶於前胡氏望文生義不顧所安  
往往如此

秋九月葬衛獻公

齊高止出奔北燕

何以稱北燕別也范氏甯曰南燕姬姓在鄭衛開北燕姬姓  
在晉北傳曰高止好以事自爲功且專故及

冬仲孫羯如晉

三十年春王正月楚子使薳罷來聘

夏四月蔡世子般弑其君固

不日者史失之

五月甲午宋災宋伯姬卒

災有日卒無日見以災卒也君母而災卒焉無臣子也宋災火延伯姬舍左右請避姬曰婦人保傅不俱宵不下堂越義而生不如守義而死遂逮乎火而死蓋年六十餘

天王殺其弟佖夫王子瑕奔晉

傳曰僭括將爲亂立佖夫佖夫弗知羣臣殺之非也若羣臣殺者不當坐王矣瑕者佖夫黨也走之晉不言出蓋自外去也傳言自周無出非也周公之奔也自內出也故特言出王子朝之奔也自外出也故不言出。陳氏曰凡王殺不書雖王子不書甚者母弟亦不書必殺無罪也而後書非也殺王子母弟虐及骨肉安得不書刑殺國之大事雖天王義得專殺不容不書也春秋書殺之例亦不論有罪無罪也說者徒見經書王殺止此一處妄爲之說耳不知理不可通也

春秋全經魯書刺者亦僅有二豈亦比諸王殺不書必殺無罪而後書乎周魯積弱皆以相忍爲國其所誅殺本視他國爲少耳

秋七月叔弓如宋葬宋共姬

鄭共葬非禮也葬舉諡稱共姬者婦從夫諡正也傳曰賢也非也紀叔姬不稱諡媵也此稱諡嫡也

鄭良霄出奔許自許入于鄭鄭人殺良霄

傳曰霄汰侈嗜酒奔許復入襲鄭伐公門死乎羊肆不言大夫非大夫也出奔位已絕。方氏苞曰不再言良霄與宋華元異者許鄭接壤方奔而卽入也不言復入與宋魚石晉欒盈異者亦方奔而卽入也

冬十月葬蔡景公

蔡景何以葬魯往會也謂賊不討不書葬者非也

晉人齊人宋人衛人鄭人曹人莒人邾人滕人薛人杞人小邾人會于澶淵宋災故

會未有目其故者此曰宋災故何也嫌也不曰宋災故卽安知不疑爲討蔡故或以他事會乎恤災小惠也討賊大義也亂賊而不討乃更宋喪歸其財大夫稱人恒辭耳會無魯大夫魯宋姻也蓋會葬時已歸財矣此會魯不與故不書傳曰諱之非也于稷成宋亂何以不諱公

三十有一年春王正月

夏六月辛巳公薨于楚宮

楚宮非正也公蓋自楚歸而寫放其宮故名楚宮

秋九月癸巳子野卒

野卒不地葬不書故也何以故蓋賊由季氏也傳稱子野以毀卒疑季氏爲之辭

己亥仲孫羯卒

冬十月滕子來會葬

諸侯之葬諸侯會非禮也

癸酉葬我君襄公

十有一月莒人弑其君密州

傳曰犁比公虐國人攻而弑之立展與展與者去疾弟去疾奔○傳曰展與因國人以攻莒子弑之乃立陸氏淳疑以字當爲之字懿行案以已古通用非誤也文十八年莒弑其君庶其傳同

春秋說略卷九